



SAOPĆENJE ZA JAVNOST

Malverzacije s budžetskim grantovima

Potvrđena najveća optužnica od 118 tačaka

(Brčko, 31.1.2024. godine)

Tužilaštvo Brčko distrikta BiH podiglo je optužnicu protiv Alena Mujkića (39)*, odgovorne osobe u dva brčanska udruženja, zbog sumnje da je zloupotrebama budžetskih grantova, sebi i drugima pribavio imovinsku korist preko dvije stotine hiljada KM. Podizanju optužnice prethodila ja najobimnija antikorupciona istraga višegodišnjih malverzacija s budžetskim grantovima, nakon koje je Mujkić, kao odgovorna osoba u dva udruženja, optužen za najteži oblik zloupotrebe položaja ili ovlaštenja i pranje novca. Optužnicom potvrđenom pred Osnovnim sudom, Tužilaštvo je zatražilo oduzimanje imovinske koristi od svih osoba kojima je pribavljena, u ukupnom iznosu od 232.703,07 KM. Uz oduzimanje imovinske koristi od optuženog u iznosu od 74.419,07 KM, Tužilaštvo je sudu predložilo da mu izrekne i zabranu vršenja dužnosti u udruženjima i fondacijama u maksimalno propisanom trajanju od deset godina.

Optužnicom od stotinu osamnaest tačaka, od koji se svaka odnosi na posebnu malverzaciju s dodijeljenim sredstvima, Mujkiću se stavlja na teret da je od 2017. do 2021. godine, kao osoba zadužena za osiguranje zakonitosti rada i raspolaganje novcem u udruženjima *Sportaš i Centar za turizam i kulturu*, sredstva grantova trošio u svoju i u korist trećih osoba. On je optužen da je, iako je bio dužan da raspolaže i upravlja imovinom udruženja s dužnom pažnjom, na odgovoran i zakonit način, u najboljem interesu udruženja, iskoristio položaj tako što je protivno ciljevima oba udruženja trećim osobama plaćao ugovore o djelu, odnosno usluge koje nisu izvršene za potrebe udruženja, te da je novac udruženja trošio za lične potrebe. Kako se navodi u optužnici, on je fiktivno prikazivao utrošak skoro polovine sredstava koje je za rad *Sportaša*, u iznosu od 182.000,00 KM, te *Centra za kulturu i turizam*, u iznosu od 240.500,00 KM, dodijelila Vlada Distrikta. Ova sredstva je stavljao u redovne finansijske tokove koristeći ih za svoje lične potrebe ili za plaćanje obaveza drugih osoba – zaključuje se u optužnici.

Budući da iznos imovinske koristi pribavljene ovim krivičnim djelom korupcije prelazi pedeset hiljada KM, Tužilaštvo je optužilo Mujkića za najteži oblik zloupotrebe položaja ili ovlaštenja, s propisanom kaznom zatvora od najmanje tri godine (*iz člana 377 stav 3 Krivičnog zakona Brčko distrikta BiH*). S obzirom da je velika vrijednost takve koristi stavljena u redovne finansijske tokove, on je optužen i za teži oblik krivičnog djela pranja novca, s propisanom kaznom zatvora od jedne do deset godina (*iz člana 265 stav 3 Krivičnog zakona*). Konačno, optužnicom je zatraženo potpuno oduzimanje svakog pojedinog iznosa pribavljene koristi, i to: 74.419,07 KM od optuženog, 137.384,00 KM od „Proleter“ d.o.o, 5.000,00 KM od „Fabrika osmijeha“ d.o.o, 1.900,00 KM od „Mega Corso“ s.p, 2.000,00 KM od „URC Bazeni“ s.p, vlasnik Alen Mujkić, 10.000,00 KM od M. P.1, 1.500,00 KM od M. P.2 i 500,00 KM od J. Š. Uz oduzimanje imovinske koristi, Tužilaštvo je sudu predložilo da optuženom izrekne i mjeru sigurnosti zabrane vršenja dužnosti odgovorne osobe i osobe ovlaštene za raspolaganje novčanim sredstvima u udruženjima i fondacijama u maksimalnom propisanom trajanju od deset godina.

*Preduzimanje radnji krivičnog gonjenja prema određenom licu ne znači da je to lice zaista i odgovorno za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.

GLAVNI TUŽILAC
ZEKERIJA MUJKANOVIĆ

